


Učešće na petom međunarodnom seminaru „Integritet 2018“



Državni ured za reviziju Mađarske organizovao je peti međunarodni seminar iz oblasti anti-korupcije i integriteta, pod nazivom „Integritet 2018“. Seminar je održan u Sarvašu od 05.-09.03.2018. godine. Ispred Ureda za reviziju institucija u FBiH učestvovala je Mia Buljubašić.

Cilj Seminara je promovisanje integriteta i transparentnosti u javnoj upravi. Ove godine Seminar je okupio preko 40 stručnjaka iz 25 revizorskih institucija, iz zemalja Azije, Afrike, Južne i Centralne Amerike i Jugoistočne Evrope.

Počasni gosti bili su gosp. Doan Xuan Tien, zamjenik generalnog revizora Ureda za reviziju Vijetnama, koji je ujedno i predsjedavajući ASOSAI-a (Azijska organizacija vrhovnih revizijskih institucija), gosp. Einar Gorrison, generalni direktor IDI-a (INTOSAI Development Initiative) i predstavnici Vrhovne revizorske institucije iz Ujedinjenih Arapskih Emirata, koja je ujedno i predsjedavajuća INTOSAI-a (Međunarodne organizacije vrhovnih revizijskih institucija).

Na otvaranju seminara, predsjednik Ureda za reviziju, gospodin Laszlo Domokos je naglasio da je etičko vodstvo jedan od osnovnih alata institucionalnog integriteta, te naveo brojne lokalne i međunarodne inicijative u kojima učestvuje Ured za reviziju Mađarske, a koje imaju za cilj promovisanje integriteta i borbu protiv korupcije.

Fokus Seminara je predstavljanje jednog od osnovnih alata kojeg koristi Ured za reviziju Mađarske u jačanju transparentnosti i integriteta. Riječ je o sprovođenju upitnika za ocjenu integriteta u javnom sektoru Mađarske koji je zasnovan na „INTOSaint“ metodologiji za samoocjenu integriteta. Ured za reviziju provodi ocjenu integriteta od 2011. godine i time jača svoju ulogu u društvu. U 2017. godini, 5639 institucija javnog sektora je učestvovalo u Upitniku. Ostale teme seminara odnosile su se na reviziju integriteta, edukaciju savjetnika integriteta i promovisanje proaktivne saradnje i komunikacije sa okruženjem.

Posljednji dan Seminara objavljeni su rezultati testa, te su nagrade dodijeljene ekspertima revizorskih institucija koji su dobili najviše bodova, među kojima je bila i Mia Buljubašić.

